




第貳

特別
イ 4
3152
83




關西游草

天隨自署



14
3152
83



河伏之岬 為
天隱先兄
百仙真
印

大正壬戌仲
春刊於備後

小游三十日獲詩九十首題
 曰關西游草耳目所觸漫
 然成詠動輒流于率易才
 情已鈍洗鍊未足深自愧焉
 但此須到處知友倒疑
 文酒微透頗覺快適如輞港



志德寺
 眉山



桑田氏始修鐫紵者今為予
捐贖刊此集亦可以見情誼之
厚也

大正十年辛酉極月天隨記



關西游草



東京 久保得二天隨

辛酉七月將西游臨發題壁

驛路迢迢筆硯隨。文章例自客中奇。登高能賦興須玉。載酒
而行狂亦宜。夙詫好游軼靈運。寧求采藥值安期。錦囊添重
歸來晚。應是紫薇花發時。

孤征唯賴一枝藜。行盡山陽到鎮西。側帽偏衫存故態。凌滄
搖嶽足新題。秋從林樹疎邊早。天向關河杳處低。最是出門
胸宇濶。去來跡與白雲齊。

勝地何妨作再游。海山恰好入新秋。霸家臺下魚龍變。耶馬

谿頭洞壑幽。至竟光陰易催老。除非詩酒不禁愁。此行併趁
故人約。笑指暮雲天盡頭。

三石

山陽此地扼咽喉。船阪際天雲木稠。伐石聲中車度險。亂峰
飛舞水奔流。

黃薇道中作

雲湧奇峰炎日高。記曾蹇步客行勞。黃薇故驛渾依舊。籬落
紅開夾竹桃。

車中望高島

幾歲經營帝業隆。樓船此去趁長風。江山終古有生色。日月
灼懸高島宮。

對山館夜坐同原雁泉賦

依稀島影檻前欹。薄夜涼從蘋末吹。聽到舫聲如雁起。一灣
潮漲月來遲。

軻港三律

天空海濶滌塵腸。潮氣晴開浦溆長。寺踞崖端孤磬斷。帆過
松頂一風涼。江山昨灑干戈血。煙水今成鷗鷺鄉。隨處高樓
皆可倚。探奇連日爲詩忙。

偶訪遺蹤了勝緣。山輝水映共依然。神功駐蹕遠征日。韓客
倚欄高詠年。萬頃波平翠螺蘆。一帆風靜白鷗眠。賞心最是
斜陽候。立盡島雲祠樹前。

沙鷗驚起晚潮催。逸興拍欄呼快哉。大海煙濤多島嶼。一天

風月此樓臺。誰知勝境憑詩重。自覺衰顏對酒開。欲向水心
放橈出。蘋花香漾早涼來。

四

梅田氏餉河豚。座客皆鼓舌。賞其肥美。予與雁泉不能
口一嚙。賦此解嘲。

笑消一死有東坡。長句誰能繼竹垞。唯我共君須作戒。老來
食色誤人多。

對潮樓

恍然舉足到瀛洲。終古風煙賸此樓。水與長天唯一碧。亂帆
斜照海門秋。

對仙醉樓

豫山青如黛。燧洋鏡樣平。松翠吹落水。午來島雲晴。眼界殊

開豁。意欲凌滄瀛。署曰對仙醉。賴翁所命名。奇文亞歐蘇。聊
酬主人情。其游不一再。墨痕壁上明。旭莊與鐵兜。硬語鬪輸
贏。想當擘箋際。逸氣毫端生。怡齋逝已久。積善家亦傾。樓今
歸阪氏。遺構存軒楹。予爲書匾額。勝緣終不輕。後人此憶予。
如予憶子成。

望仙樓

壁揭聿菴書。望仙名亦好。危樓高百尺。何年此營造。一灣潮
光潤。欹岸連側島。嫩嵐簇作團。亂松森翠葆。天女與仙醉。其
間通水道。南望鯨氣高。豫海波浩浩。長風颯然至。欄角夕涼
早。時有巨魚跳。淪漪漾寒藻。蹇予懷百憂。久矣塵土老。欲攬
江山勝。物外除熱惱。臨眺已移時。酣醉瓶亦倒。興王呼筆硯。

五

題詩勿草草

仙醉島

仙醉島如浮。好景世無二。前賢說已詳。佳名妙取譬。想當晨
霞升。紅日射積翠。山亦試卯飲。頽然欹羽帔。次當夕陽春。紫
靄催暝至。山亦拚晚酌。酡顏殊秀媚。更想煙雨候。海天潮氣
漬。山亦困宿醒。紗帳偏貪睡。今我放輕舟。近矚探靈異。其形
似蓬萊。數峰森排比。牛首接祇園。彌山居主位。觀月虛空藏。
巖嵒正序次。亂松吹溼嵐。秀色此攢萃。天風時鼓琴。仙鶴來
戢翅。斜岸斷復連。七浦曲而遂。行帆巖側過。浴鷗波間戲。步
自石磯登。亭榭巧排置。空水晴更鮮。雄覽頗適意。秋潮碧激
灑。周航信容易。游賞興不窮。翛然祛塵累。歸來倚危樓。午鐘

出蕭寺。玉奴捧酒觥。取次吟可試。抽毫詩亦靈。要發煙霞祕。
仙島呼將鷹。一揖吾且醉。

阿伏菟岬登觀音閣

海畔紺宇靜。日射祇樹林。爐煙結作雲。梵唄和潮音。虛廊盤
空上。飛閣踞峻岑。奇工疑鬼設。勝名傳古今。下有蛟龍窟。頰
首試一臨。凜然膽驚悸。絕壁高千尋。當面豫山澹。午天蜃氣
深。近控梔子峽。白鷗故浮沈。古佛祈有驗。惡浪莫相侵。水色
平如熨。千帆過島陰。拍欄神飛越。長風吹我襟。亂松亦鼓鬣。
韻于成連琴。於焉適曠衷。乃試物外吟。遲留攬景勝。洗盡五
濁心。

桑田氏曩舉長子。懇乞予詩。乃集葩經句。成一章十六

句書以贈焉

八

維熊維羆。長發其祥。居然生子。其泣嗶嗶。制彼裳衣。左右奉璋。實維我儀。婉如清揚。永錫祚胤。先祖是皇。無災無害。自天降康。淑慎其身。庶幾有臧。令德壽豈不顯其光。

保命酒歌爲岡本氏

保命酒歌。不可河忘。

鴻荒之世既有酒。未詳創始屬誰某。八頭蛇醉八口槽。若然割之不釋手。八雲徐繞八重垣。茲卜新居獲新婦。一劍勳高便合休。素尊當日解飲否。次有神人少彥名。功與神農正抗衡。曾嘗百草調劑好。又製藥酒勸養生。不怪邃古人皆壽。爲是和樂陶性情。典儀載在延喜式。中朝禋祀禮非輕。又傳神功征韓日。且向薇南駐仙蹕。來熊國造獻芳醇。樽罍奠楹神

降吉。明春奏凱班六師。沙頭犒飲黃流溢。傳宣錫號曰三降。大酒主姓亦無匹。吉備良醞古之遺。萬葉集中存妙詞。爾來釀法逐年進。子孫相承守業宜。聲價乃在藺席上。名流題詠鬪瑰奇。七卿西竄停橈夕。臨風浩唱笑舉卮。地黃爲主可醫痼。藥種十六香味具。美而不甜冽不醞。前人斷案得真趣。磁瓶奇古其色朱。遠輸四方封裏固。開緘苾芬衝鼻來。盃中激灑春波注。壓倒蘭陵琥珀光。直抵南海龍腦漿。下喉有聲快何極。靈液津津潤肺腸。欲問蓬萊山何處。恍然遺世神飄揚。寧知舊國臨海表。仙醉奇勝足仙鄉。保命養氣功驗大。唯有百利無一害。可憐夏禹切懷憂。要向九原成薄醪。流鬼高麗與荷蘭。信使齋歸恣賞會。頃者梯航萬里通。佳名早已遍內

九

外今茲西游滯巴津。連日雅讌觴詠頻。賴有主人贈此物。一段深情勝汪倫。爲君長歌頌酒德。吾詩應同麴米醇。驛路槐花東歸後。千里重寄碧香新。

又一首爲森田氏

滄海芳醇玉作漿。松花栢葉本尋常。旣稱名士掃愁帚。卽是仙家延命方。

神邊驛卽管茶山故里

招魂悵望白雲鄉。生不同時恨正長。一代耆英傳德業。四時風月入詞章。野田秋到稻花亂。驛樹雨過蟬語涼。欲問故居何處是。茶磨山下又斜陽。

府中宿皿谷氏

夜堂剪燭興何如。傾盡百杯尊未虛。最喜莼絲鱸膾外。新秋滋味屬香魚。

尾道

玉浦饒佳景。題詩續昨游。涼風送潮至。秋色挾山浮。市富存名利。港深容巨舟。笙歌殊可聽。來倚酒家樓。

千光寺絕頂

清晨試臨眺。古寺倚崢嶸。鳥趁孤帆去。波涵萬瓦明。山山含石氣。樹樹盡秋聲。絕頂振衣立。紅輪海角生。

馬關

疎鐘落日彌陀寺。喬木流雲壽永陵。一自冕旒葬魚腹。海門濤勢雪崩騰。

八月初八至久留米主宮崎來城家來城有三律見似
次韻抒懷

形容共非舊兩鬢點新霜仍想關河阻旋經歲月長涼翻苧
衣白秋到井梧黃勝會詩須紀吟成入醉鄉
老來塵累少松下掩柴扃題柱已違志草玄仍有亭餘生偏
偃蹇故友易凋零相見情逾厚居然雙眼青
十五年間事尊前說向君人情翻覆手游跡去來雲長孺嗟
薪積敬通甘蕙焚文章重古調傲骨久離群

太宰府訪吉嗣鼓山

啜茗南軒下清風可解襟一家名父子十畝好園林畫自承
真訣詩何費苦吟秋來病初起松徑共相尋

望天拜山

名節雙高絕代無暮年遷謫竟捐軀西風猶捲冤聲入天拜
山頭松一株

來城導予游武藏溫泉藤瀨冠村邀飲席上來城先有
詩次韻併似冠村

爾我襟懷醉裏知當筵一笑了幽期月因移影夜初警秋欲
成聲涼乍吹風格既同江左秀文章須趁鄴中奇幽庭忽有
新蟲活個個疏花露滴籬

御塚

三重濠繞一佳城千載猶傳御塚名寶氣已隨金盃散天陰
雨溼鬼無聲

恆屋三徑邀飲予於十景樓賦似

清夜宜高會。新涼滿座隅。好斟元亮酒。併斫季鷹鱸。祠樹秋聲肅。江樓燭影孤。放歌胸宇爽。愁到醉邊無。

憶昨行似次弟

憶昨共爲鎮西客。霸家臺下留萍跡。破帽弊衫不諱貧。與君游敖聊自適。十里松溼帶潮痕。宸筆長耀伏敵門。一自神風覆胡艦。夜夜蛟宮泣幽魂。神后偉業邈千載。巨檣化石半沈海。迂路去賽香椎祠。廟貌丹青存華彩。他日南向萱關過。水城作墟長秋禾。觀音寺古疎鐘歇。都府樓空敗瓦多。雕甍畫垣巧位置。神苑鶴鳴散嵐翠。緬想白屋拜御衣。西風頻灑戀闕淚。寶滿山高青挿天。石徑如綫斷復連。手挽鐵鎖窮絕頂。

長嘯曠望斜陽前。當時大陸戰雲壯。入秋渤海怒潮漲。海陸連勝我武揚。諸將名揭麟閣上。君云夙志在封侯。丈夫報國死合休。一文一武班家似。肯落人間第二流。廿年一夢烏兔走。君今榮達帶朱綬。獨憾先人不及看。七尺堂堂好身毛。疇昔來城駐吾車。行李托在黃公家。喜君休沐遠相訪。涼燈影裏酒可賒。北筑景勝仍如昨。水自汪洋山峯嶮。重游已尋鴻爪蹤。矧有往事資笑謔。老思同氣情難堪。欲盡山中十日酣。明發携手行亦好。球摩峽東火州南。

車中望雲仙嶽短歌

車過長洲驛。遙望雲仙嶽。拔海而起撐空高。高五千仞何超卓。卓島耶陸耶看且疑。景行西征年代邈。滿山草木鬱青青。百

里合沓毓秀靈。黛光鬢影添姿態。雲袂霞裾更伶俜。絕谷冰堆不知暑。掬到神瀆可延齡。登臨曾當清秋曙。手排閭闔迎日馭。濟勝固非過眼緣。其奈歲月堂堂去。指點顧向傍人誇。二十年前振衣處。

十六

球摩峽

亂山幾低昂。中間灘流駛。峽險過夔巫。連亘一百里。奇巖無依傍。兀自溪頭峙。老松皆倒生。枝幹虬龍似。衆籟相呼應。颯乎天飈起。其聲聽方遠。白雲飄如紙。湍鳴水怒奔。餘流洗山趾。壑底萬雷轟。喧駭人耳。滙合乃作潭。盤渦轉不已。翠巒影難全。性妬水亦爾。昔我僦扁舟。一過疾于矢。唯見岸樹移。群巘隨披靡。飛沫雜蛟涎。水府真尺咫。宛從天上落。其快無

可比。今有鐵軌通。艱阻盡疏理。巨洞穿巖腹。一路長透漚。攬勝興容與。穩坐車箱裏。仰揖萬仞山。俯掬千溪水。野色忽豁開。炊煙簇成市。迴看晚靄深。峽口斜照紫。

人吉翠嵐樓題壁

一水欄下奔。數峰檐角立。日色青逾澹。叢樹圍原隰。浴後晞髮處。秋氣凜相襲。山輝水更激。煙嵐可嘯吸。遠風有時來。颯然松籟急。疎蟬激清奏。須臾斜照入。好景與目謀。不許俗屨及。此心返自然。此身無羈繫。

日南久客舍

高下亭臺簇作鄉。海山景勝不尋常。半空淨插雲仙嶽。一水晴開天草洋。煙抹螺痕歸舫緩。風翻魚氣釣磯涼。靈泉已是

十七

清心骨。坐臥思詩忘日長。

立願寺浴舍

午眠初覺處。無事卽真閒。樹色暝籠郭。蟬聲涼滿山。縱情名利外。寄跡畫圖間。浴後知秋早。開尊又解顏。

高山仲繩墓

吾心忻慕久。身後姓名揚。頗類唐衢哭。仍勝阮籍狂。終生困逆旅。夙志在勤王。古寺清秋曉。墳前手薦香。

大伴部博麻碑

我軍大敗白村江。從是羅濟非藩邦。血戰力盡作囚虜。生遭薄祜亦無雙。爲友賣身何所悔。背生蟲蛆猶健在。枕上歸夢偏易醒。故國千里隔滄海。頭白面皺真可憐。流落唐土廿餘

年。志行不類軍丁賤。直與蘇武可比肩。生死難易忽然別。丹心一片存餘烈。遲暮幸得就首丘。天朝賞賜旌苦節。事蹟湮晦世代移。水史列傳亦遺之。獨喜此地近桑梓。豐碑長傍篠山祠。

久留米雜詠

紅蓼花開覆石磯。笠檐蓑袂帶斜暉。收綸得意矜奇獲。潑刺香魚尺大肥。

新涼吹動柳絲風。夾路亭臺澹靄空。眉月依依初夜候。羅衫人賽水天宮。

家家祭掃弔幽魂。古寺松楸夜月昏。藍褐茜裙成隊去。一川燈火送中元。

別來城

日向雲仙山外沈。秋城樹色帶煙深。離愁一片難消遣。付與殘蟬抵死吟。

中津訪福澤雪池翁故居

明時先覺軼群才。生畫凌煙何有哉。甕牖繩樞總如舊。果然人物出蒿萊。

自性寺觀池大雅書畫

大雅古君子。清高類嵇阮。疎放雖爲性。至情極誠悃。早歲趁南宗。南海源流遠。譬如摩詰後。北宋出北苑。書亦撫獻之一。意務窮本。應笑祝董徒。滔滔不知返。何妨落筆跡。醜陋而奇蹇。細視氣品高。苦心抵深穩。自性古精藍。藏弄無虧損。滿壁

賸雲煙。相戒不越闕。我來此遲留。心賞意繾綣。髣髴見其人。敢憾斯生晚。

耶馬谿十律

百八峰巒底。十三村落開。涼風吹又到。遠樹簇成堆。谿蹙泉聲大。巖欹鳥道回。只須攬幽勝。詩筆試吾才。高秋詩興王。得意引筇過。隔壑樹聲度。環村山色多。曾游猶夢寐。生路莫蹉跎。滿目煙霞麗。探奇行且歌。峽底斜通路。高低幾十程。溼雲補峰勢。涼吹亂泉聲。欲闡神仙祕。偏矜杖屨輕。林霏散無跡。一鳥報新晴。山山看不飽。忽被白雲遮。洞壑欲無路。耕樵猶有家。石泉經雨活。崖樹受風斜。涼氣翻衣袂。行行發興賒。

日午秋霞澹。迎人鳥語喧。危峰截雲立。亂水拍崖奔。林下全無暑。谿頭又一村。芒鞋不辭險。步步近仙源。石破天驚後。五丁初畢工。松杉晴尚溼。澗壑午還風。長路行無倦。群山看不同。巖頭時一嘯。顛氣滿秋空。泉自樹梢濕。千峰蒼翠圍。幽花向日媚。去鳥背人飛。路仄雲黏屐。天清涼透衣。何來秋色杳。谷口一樵歸。林巒妙於畫。拾句且徜徉。萬壑已秋意。一峰猶夕陽。入雲歸鳥沒。抱樹晚蟬涼。幽境探難盡。天昏去路長。詩成歸亦好。晚景乍淒迷。避石谿流曲。離山地勢低。亂煙孤驛外。斜照古林西。一路行人絕。羈禽趁暝啼。峽口時回首。擎天石是屏。谷風疑虎嘯。潭水帶龍腥。漠漠棧

雲白。濛濛崗樹青。言歸便投宿。薄暮叩柴扃。

前詩意未盡。乃續成十絕句。

新晴一路客行閒。幽僻由來仙所寰。看到冷雲低樹外。分明紫翠繪秋山。

微吟閒步影伶仃。濟勝唯須險路經。危棧飛流三十里。晴煙刷作萬山青。

剗地涼風颭客衣。峽中樹色帶煙霏。深湫決作奔湍急。忽見谿魚挾雨飛。

雨過谿頭霽色分。亂蟬聲急隔林聞。青山朶朶爭先出一颯。天風掃白雲。

夾路松篁鬱作林。林端日午轉幽禽。遙天猶有雲搖曳。山與

秋光有淺深。
 棲真何處洞天幽。步到谿泉欲盡頭。古木蒼藤莽無路。暝嵐
 低地鎖清秋。
 松風度水韻於簫。目斷峽天秋色遙。斜照亂山高下路。一肩
 黃葉有歸樵。
 日落千峰暮色生。風從木末捲秋聲。碧奔青倒攔不住。出峽
 人隨流水行。
 疎鐘一杵出林時。貪景低徊移屐遲。水態山容多變化。詩懷
 偏與夕陽宜。
 高低錯出幾千峰。雲木蒼蒼嵐氣重。仰見奇巖聳天半。斷猿
 聲在倒生松。

山移村宿矢野玉泉宅

探勝羸車歸正遲。煙嵐化作滿囊詩。塗鴉數紙堪相贈。日暮
 山亭借榻時。

馬谿文庫訪小野櫻山

歸田夙與利名疎。獨對青山讀異書。別有高情老逋似。種梅
 日日把鴉鋤。

宿羅漢寺

傍崖樓脚高。招提境自靜。涼颺入紗幮。夢醒宵正永。四更看
 月生。莎底蟲聲警。白雲衆壑平。莽莽夜山影。夔絕塵外蹤。萬
 慮都驅屏。秋氣殊可人。露華溼衣冷。耿耿終不眠。倚欄撫清
 景。墟落燈火殘。曙色自遙嶺。

洞鳴峽

群山頻奔倒。峽天忽開朗。怪石個個殊。何人能摹倣。或如蹲虎豹。或如鬪獅象。或競晉楚雄。或爭滕薛長。橋勢似拖虹。其下亂流響。一頓成瀑布。珠玉紛跳盪。鄰之洞壑閒。曠絕固無兩。仙客跡可尋。迴睇神已往。煙歛朝暉麗。松吹入秋爽。祇有化工奇。眷我出塵想。

馬谿之游。豐田鏘堂為導。發中津。經柿阪。至山移。矢野玉泉。相迎聯屐。窮深耶馬之勝而歸。延予於其宅。而鏘堂以事辭去。其翌。玉泉為導。至青村。誘山本草堂與偕。游羅漢寺。三人同宿。其翌。玉泉亦辭去。草堂乃引予。游洞鳴峽。既而旋憩丸山亭也。鏘堂來迎。因別草堂。共歸。

中津三日間。東道屢易主。諸子皆雖係生面。一見如舊。周旋甚力。縋幽鑿險。無復遺憾。乃賦一絕。聊表謝意云爾。

勝地頻逢東道人。且從物外悟前因。煩君指點看山處。詩與涼秋一樣新。

過青村竇道。有感于僧禪海之事。乃賦此。以一婦故戕其主。斧鉞之誅不足數。由來小忿易誤身。翻憐悔後心更苦。一朝薙髮歸佛門。雲情水思避塵煩。餘生何以償罪障。聊期濟世種善根。鎖戶渡頭山峭絕。脚躡飛梯膽破裂。欲開竇道便行人。乃與愚公出一轍。巨鎚鑿石不停聲。山魃木魅半宵驚。誰是千里尋蹤至。祇恐一死志難成。生身菩

薩慈悲相。其人起敬甘相讓。決然亦入役夫群。夙夜分勞氣力壯。三十星霜去忽忽。三百餘步路初通。至是老軀終無用。願斬吾頭祭乃翁。世上恩讐仍孽業。多謝憑君悟妙法。握手而泣分袂還。畢竟縱仇亦非怯。奇聞終古猶覺新。但憾戲劇動亂真。智剛寺裏埋骨穩。僧名禪海北越人。

大西蓬萊女史來過見貽近著北海游草賦似

婦職固期家室安。女中才藻古來難。性靈詩句誰相比。近有虞山席佩蘭。

寡鵠空閨昨夢回。好將韻事遣餘哀。新詩翻有鬚眉氣。寫出冰天雪窖來。

扇城吟社諸子觴予於竹枝亭席上分韻

忽漫相逢亦夙緣。低吟淺酌美人前。同心有友皆詩客。傲世之情抵酒仙。明月來臨秋水渺。嫩涼吹動藕花妍。無端想到分襟苦。譜得新愁入夜絃。

別府

樓閣溫泉國。繁華久耳名。貪眠到日昃。罷浴看潮生。地獄吹疏霧。芙蓉繪晚晴。欲窮海山勝。飯後試吟行。

海門寺賦似黃龍上人

湯氣吹颺萬井煙。玉人笑語畫樓前。閒來好借僧房榻。獨聽松聲盡日眠。

夜半航豫豐間舟中放歌

菡萏灣頭月上遲。一汀燈火漾淪漪。薄夜餘熱未消盡。苦待

三十
好風入衣吹。陰雲四合滄溟黑。宛然身落蛟龍國。一睡夢醒
更已移。獨立舵樓人不識。唯見金波浸天流。鮫宮蜃闕齊盪
秋。露洗九霄星漢白。涼氣和煙水面浮。觀海初可語大理。有
時怒濤排空起。快意最與變化宜。嗚呼丈夫不徒死。

至讚州宇多津。重過濤聲嶽影樓。用前年留題詩韻賦

似原雁泉

疇昔玉浦別。客行各東西。停雲幾引領。千里魂夢迷。旋自南
豐至。下車步江隄。四山蘸鬢影。潮色似玻璃。門有稚子候。樹
背斜陽低。青田環屋開。禾穗抽已齊。邀我樓上坐。芳醇拆封
泥。適意方可比。羈禽歸舊栖。君性真絕巧。寧輸鍛柳柘。長日
行樂好。何曾悲馬蹄。每怕違夙約。邱園心賞睽。新涼燈初上。

醉吟續前題

鄉照寺

青峰一千仞。古寺倚山阿。歷劫繁華盡。憑高感慨多。殘霞仍
有色。遠水自無波。斜照疎鐘裏。西風拂薜蘿。

同雁泉。至赤穗。館於司波氏。福田眉仙來過。賦似。

趁約君方至。清歡愜素心。題詩不停筆。對酒又披襟。半夜燭
華亂。一堂秋氣深。蓼城多景勝。明日共相尋。

御崎海樓偶拈

峭涼到骨怯單衣。十八洋遙欲落暉。雨過松光青似染。天低
潮氣白成圍。洲前舟去群鷗亂。浦口風高一鷲飛。久矣浮生
漫萍梗。家江蓑笠與心違。

華嶽寺觀大石良雄手植松

華嶽寺中松兩株。植之者誰石大夫。龍臥龍躍一偃蹇。百步之間涼蔭鋪。老幹屈曲葉交接。鐵爲肢體石爲骨。材到棟梁堪欽仰。歲寒便見後凋節。有時明月悄相尋。不斷清風颯然侵。仙客吹笙何處往。湘靈鼓瑟曳餘音。曾遭鶴弔心殊苦。次向東薇收封土。如此悲歡誓不忘。移來乃自相生浦。他年去國偏遲遲。樹下盤桓多所思。造次仍看用意細。捨田長充香火資。滄桑已過二百歲。金碧依舊免衰替。堂上遺像宛如生。四十七人魂可祭。孤磬敲斷斜照前。嵐氣襯地晚蒼然。松兮不願大夫爵。松兮却憑大夫傳。

大石祠

廿歲重過義士鄉。遺墟今日儼祠堂。故國神游合無憾。一邱花木帶輝光。

山鹿素行謫居址

曾校先生書。此心增傾慕。洙泗真傳絕。俊傑乃騰鶩。周孔直可師。履行是本務。邦俗元尙武。韜鈴亦要具。懲羹者吹蠶。當路漫相惡。檻車送播南。故君善調護。慎獨無惰容。教人有餘裕。後來義士出。卽因餘澤住。十年值赦歸。門下猶景附。聲望老更高。臥病嘆遲暮。今我尋遺躅。城西暫停步。一邱沒荒蕪。禾黍欲無路。墟落夕陽低。亂鴉集喬樹。愴然傷懷抱。回踵猶睠顧。世情水東流。百弊堪悚懼。何由振名教。爲道起癢癩。

赤穗窰鹽竈香爐歌謝前賀蓼城惠貺

赤穗之海徹底清。煮而作鹽白晶瑩。士風純同鹽味潔。共擅
 今古第一名。四十七人齊赴義。臥薪嘗膽心無貳。雪夜直斫
 仇家門。一擊能成故君志。憶昔僦舟自薇南。停橈一灣綠波
 涵。沙頭火殘人初去。蘆花擁岸吹曉嵐。今日城中又弔古。西
 風滿目剩瓜圃。寒煙澹日石氏墟。老櫻葉蠹黃如雨。山人墮
 陶技不粗。創意新奇聲譽殊。便取大夫舊庭土。巧模齷齪作
 香爐。慇懃相贈不毫惜。感君意厚踊三百。齋歸擬置吟牀頭。
 緬懷兩度曾游跡。聞道攝播閱兵年。內官傳獻御座前。果否
 楓宸日長候。珠簾繞閣颺篆煙。獨奈末俗人心壞。誰勵忠義
 垂勸戒。一炷好招義士魂。餘香薰破大千界。

赤穗諸士招飲旗亭醉中賦似

致辭

逢秋吟骨健。勝會興如何。疎雨捎修竹。新涼透薄羅。怯將羈
 客恨。譜入美人歌。翦燭餘歡在。雲煙落紙多。

兒島高德墓

勤王夙志終不移。身居偏裨履艱危。到底驥足無由展。絕似
 李廣命數奇。行宮雨暗落花夕。白樹題得十字詩。他日君王
 能記否。從前越國有范蠡。峰堂一敗因懦豎。獨備夜襲拔營
 遲。篝火已殘鼓聲歇。歸來從容收錦旗。先聲之功等楠子。只
 願中興壯帝基。瓜分天下賞太濫。翻覆綸旨亦徒爲。重見煙
 塵捲地起。紛紛世局如奕棋。南風不競恨何極。一身轉戰頻
 奔馳。就中熊山兵殊寡。絕而復蘇裏創騎。且喜要衝落我手。
 七路賊軍盡紛披。入京潛圖殪渠帥。其奈蹤跡被人知。銜命

東邊募義故。鑿輿南遷又愆期。暮年衲衣避指目。千里間關
飛錫姿。例是神龍藏其尾。誰料終焉屬荒陲。播南今過阪越
浦。崗頭儼存三尺碑。鐘沈魚默金碧古。西風颯入祇樹吹。伏
匿擇地良有以。矧又養痾久在茲。安得飛舸時一出。山陽南
海歸指麾。想見破牀易簀際。薄暮空山鴉語悲。整頓乾坤終
無日。撫枕痛憤涕交頤。由來僻論動駭世。高齋學士漫好奇。
直將烏有子虛比。却忘偉績關綱維。蓋臣典刑公獨在。傾厦
誓欲一木支。畢竟成敗何須問。氣節風流千古垂。

阪越港

新秋天放晴。漾漾午潮平。餘靄抹空澹。一帆離岸行。海山堪
縱目。鷗鷺豈無情。顧愧羊裘客。風塵誤此生。

神戶別雁泉

幾處憑君慰客游。江湖滿地跡悠悠。今宵話別一尊酒。明日
相思兩地秋。

關西游草終

錄附聯

句

天隨 雁泉

對山館偶得

晚風吹送白帆多。泉漾漾潮平水不波。隨魚躍聲中秋到。早泉
 斜陽浦口起漁歌。隨
 蘋香偏向檻前饒。隨盪槩漁娃歌自嬌。泉仙醉島欹螺髻翠。隨
 依稀影落海門潮。泉
 看雨高樓對酌宜。泉海天涼氣入簾吹。隨亂松振鬣晴猶溼。泉
 一片飛虹返照移。隨

福山

三日巴津滌俗腸。泉樓頭嘯向海風涼。隨入城乍覺流金熱。泉

陌上古槐蟬語長。隨

葦田川打魚

一帶溪山秋氣澗。泉水潑洄處石峻。隨宛然身在家江上。泉
 快見香魚跳上罾。隨

千光寺絕頂

清幽絕似給孤園。泉隔院經聲聽不喧。隨四國風煙晴可畫。泉
 依依遙翠曉當門。隨
 既從淨界息諸緣。隨長嘯振衣立絕巔。泉五色雲開樓十二。隨
 一輪日照界三千。泉

濤聲嶽影樓題壁

倚欄浩嘯氣如霓。泉尊酒可傾詩可題。隨斜照落霞天上下。泉

漁歌歸艣水東西。隨

御崎海樓

青山當面是何州。泉雨氣低迷海色幽。隨聽到濤聲間松韻。泉
兩般涼味七分秋。隨

大石祠

一死留名照汗青。隨崢嶸祠宇傍林坳。泉君蒿悽愴神來格。隨
終古義人猶有靈。泉

錄附 聯 句 終



号方衣
解印沐沐动方同
第表海海振中

百友
真世成
踪多天派



